



Dao wo ich gebaore bèn Oetgaaf van Veldeke krènk Zitterd Zitterd-Gelaen-Bor



VELDEKE - ZITTERD

Jaorgank: 28. Nr. 46
September 2015

Weurdje veuraaf: Same sjterk!!!

"In dees oetgaaf"

Verhàölkes en gedichten
gesjreve door:

Leon van Binsbergen
Peter Boudewijn
Wiel Gielkens
John Hertogh
Jean Knoors
Phil Schaecken
Patrick Werdens

Foto's:
Patrick Werdens
Jean Knoors
Leon van Binsbergen
Harrie Claessen

Veurzitter:
Jean Knoors
Kastanjestraat 8
6127 EA Grevenbicht
046-485.72.06
j.knoors@kpnplanet.nl

Sikkretariaat:
Patrick Werdens
Chr. Kisselsstraat 3
6131 BV Sittard
Til: 0464587140
p.werdens@gmail.com


Bankraekeningnómmer
Rabobank Zitterd-Gelaen
O.v.v. Vedekekrenk Zitterd
NL85 RABO 0187 6214 54

Lay-Out en samensjtèlling:
Harrie Claessen oet Beeg

In de Nuutsbrief nummer 18 Van Veldeke Limburg van december 2014 haet al een kort berich gesjtange van 't samegaon van de Veldekekrènge Zitterd en Gelaen. Doordet de Krènk Gelaen zich haet opgehaeve zeen de leje automatisch lid van de Veldekekrènk Zitterd, dae noe 'n groat gebied besjtrik, wo de plaatse Zitterd, Gelaen, Bor, Baek, Sjtein en Sjenne, same mit de kleinere dörpe en wieke ónger valle. Det de krènk in zien nuuj samesjtèlling de naam Zitterd blif hawte beteikent gaaroet neet, det Zitterd in 't vervoug de deens geit oetmake in de nuje groate krènk! **Det zow ziër sjlech zeen en det kan en zal ouch noajt de bedoeling zeen!** Daoróm zeen v'r erg bliej, det Jos Zelis vanoet 't Gelaense besjtuur in 't besjtuur van de Krènk Zitterd is gaon zitte.

Mer gemaekelik is 't opgaon van de Krènk Gelaen in de Krènk Zitterd noe ouch weer neet. 't Zal zeker in de kómmende jaore nog 'n hiël óngernumming zeen, óm van de groate Krènk Zitterd 'n good samewirkingsverbendj te maken, wo in jeder plaats, groat of (piep) klein, mit zien eige taal en gebroeke ziene driëj zal en kènt vènje. Det is op de ièste plaats de opdrach van 't besjtuur, mer in neet mindere maote ouch die van de leje zelf.

Daoróm doon ich es veurzitter names 't bestuur van de Veldekekrènk 'ne klemmende oproop aan alle leje oet welke plaats dan ouch: Laot eur sjtöm huëre es geer 'n good idee höbt veur 'n baetere wirkung van de Krènk, mer zeker ouch es geer get sjoans gesjreve höbt, 'ne teks of gedich, waat beveurbeeld in oze Nuutsbrief DWIGB of in 'n apaarte oetgaaf geplaatst kan waere!!! Bie veurbaat oze groate dank daoveur. Same make v'r de Krènk sjterk!!! Doot mit en vertèl, sjrief of zèng euver: Dao Wo Ich Gebaore Ben!



Bezoek aan Houtem

Zunjig 4 oktober 2015 maakt oze Veldekekrènk mit Jean Knoors es gids een middigwenjeling door het prachtige dörp Holtum, plat-e-weg gezag: Houtem. De naam Houtem is afgeleidj van "Hout heem" wat beteikent "nederzètting in 't bosj".

Houtem is ein van de sjoanste dörpe in 't sjtadsdeel Bor. Tot 1982 huërde 't bie de zelfstenjige gemeente Bor, die in 2001 opging in de groate gemeente Sittard-Gelaen. Houtem is 't buurdörp van Buchte, 't angere dörp van de vreugere gemeente Bor. Houtem ligk noe ingesjaote door 't Julianakanaal, 't bedrieveterrein Houtem-Noord en de auto-waeg A2. Op 't bedrieveterrein ligk óngerhenjere autofabrik NedCar/ BMW.

Te bekieke waerd

'n Wenjeling make door Houtem is 'ne loup make door de gesjiedenis van 't prachtige dörp langs twee prachtige kesjtiele, zoa es Hoes Houtem, 'n omgracht hiërenhoes oet 1633 en kesjtiele _Wolfraath, det veur 't iës in 1386 wurd geneumd. 't Kesjtiele van noe is oet is van 1628 en is omgracht. Daonaeve haet Houtem 'n monumentale Sint Martinuskirk mit eine 13^e-iëuwse mergelsjteine taore, woo-in 'n klok ing koet 1646. Wiejer is t'r nog de Poolmeule, 'n watermeule/kaoremeule oet 1662. Midden in 'r dörp sjteit 't Heilig Hartbeeld oet 1929 op d'n hook Panneshofsjtraot/ Martinussjtraot.

't Programma

14.00 oer: Biejeinkoms op de Mert in Houtem. (Vrij parkere)

14.15 oer: Wenjeling langs de kesjtiële van Houtem en door de aw dörpskern

16.00 oer: Aafsjoeting mit koffie en vlaai, veur eige raekening.

Insjrieve

Deilnummers aan de wenjeling mótte zich veur 1 oktober 2015 aanmelje bie de sikkretaris van Veldeke Zitterd: Patrick Werdens, Chr. Kisselsstr. 3, 6131 BV Sittard, t.: 046-458 71 40, e.: p.werdens@gmail.com. Aan de wenjeling zeen wiejer gein köste verbónje



Houtem-Sonnet

't Haw zich versjtaoke achter buim en hëkke,
De maedjes sjeelde in d'n allei;
Alle moders beke zelf de wëkke,
En de keu lepe in de wei...

't Haw zich versjtaoke achter buim en hëkke,
De boere wirkde op de hej;
De hoonder kakelde: ze ginge lëkke
En de jónges vösjde in 't Gelei...

Mer ze höbben 't toch gevónje,
Wo vreuger 't kaore woort gebónje
Sjterve lènje bie 't kesjtiele!

Ze höbbe Houtem toch gevónje,
In plaats van veljer: industrie!
Gelökkig, weer höbbe nog oos "hermenie"!!

H.H. v. Sloun (+ 2002)
(Albaer van de bekker)

Wie 'n moder häör kèndj

E fien kaoreblömke sjtóng dao
allein, greutsj, tösje de sjtein
de sjtein van ós terras.

'Hie bèn ich
wae deit mich get?'
leek 't te zègke.

E bitsjke wèndj
weigde 't blömke
wie 'n moder häör kèndj.

Es dat gein teike van haop is
dat kaoreblömke
tösje sjtein.

Klein kleurke oppe welt.



Phil Schaecken

Sjmerig sjaor en anger werk

Is de naam van de tweede bundel van John Hertogh mit gedichskes en verhöölkes in 't Zittesj. Naodat hae zien eesjte buikske haw oetgegeave "Veur uch van mich deil 1", woort häöm dèkser gevraog: "Wo blif deil twee?" Dit is d'r noe; 'ne angere tittel, mer toch mit dezelfde insjtaek. 't Zeen sjriefsels euver al wat óm John haer gebeurt en die hae wilt doorgaave op 'n lóchte meneier, zónger vööl pretensies, mit 'ne lach en mit 'n traon.

De Veldeke krènk Zitterd is d'r greutsj op dit nuujt bouk van John oet te mage gaeve in zien eige literaire lies.

John Hertogh, gebaore en getaoge in Zitterd haet veertig jaor gewirk in 't leger óngerwies. In de loup der jaore haet hae gedich, gesjreve, reisverslage gemaak en zien herinneringe vasgelag. Hae is ó.a.lid van Algemeine Sjrieverskrink Veldeke, sjteit in versjeie edities van Platbook, is in 2014 genomineerd es Zwentibolddichter, sjrif al jaore veur Dao Wo Ich Gebaore Bèn en nog mee. Kortóm eine Zitterder dae zien gedanke gaer op papier zèt.

Sjmerig sjaor en anger werk kènt geer besjtèlle via de Veldeke krènk Zitterd of koupe bie boukhanjel Krings.



Es 't hart sjtop mit kloppe

Es 't hart sjtop mit kloppe, es 't hart sjtil blif sjtaon
jao, dan vilt 'patsj!' 't leich oet, is 't laeve gedaon.

Van de raengebaog zeen veer dan neit mee de kleure
en helle meziek, dae zal neit mee sjteure
gaar neit mee dènke aan dae zomer aan zee
en ouch dat diploma dat tèlt dan neit mee.

Dan maak 't neit oet was te nog wols gaon make
of eine volle agenda mit belangrieke zake
was te nog wols gaon sjrieve of nog wols gaon doon
'Zègk, waar dat noe lelik of waar dat noe sjoon?'

Wat zeen veer toch braekbaar, nog 'klein' wie e kèndj
jao, gaaroets neit mee es 'n vaer in de wèndj
en jeder dae meint hae is ech nómmer ein
es 't hart sjtop mit kloppe, zak ouch dae door de bein.

D'róm luuj: Blief geweun doon, gaef leich wie de maon
en vilt 'patsj!' dat leich oet, nou, dan is 't gedaon !



Phil Schaecken

Ein eppelke

Ein eppelke in eine boum keek in et rónjd,
al waar vol kleure en kakelbondj.

Zellef kreeg et ouch de sjoonste kleure,
mer doe góng get gebeure.

Et eppelke waar zo zjwaor wie eine stjein,
mer dat vónj 't stjeelke gaarneit fein.

Opèns raakde 't eppelke los en
veil et nao ónger en waar de klos.

Haarie zoug 't en dach waat lik dao,
sjnap et dich angesj is et veur ein krao.

Et eppelke lachde häöm aan en zach,
ich sjmaak baeter dan ein banaan.

Haarie koosj dat goud bevalle en
zoo waar 't eppelke neit veur niks gevalle.

Léon van Binsbergen 2015



Sjtarre

Kiek ich nao de hemel
zeen doezend sjtarre sjtaon.
dénk ich, jummich Leivenheerke
wie hób geer dat gedaon.

Léon van Binsbergen 2015

Aeve Prakkedènke

Veer höbbe weier door d'n diskjenaer zitte wuile en höbbe get aw Zittesje weurd gevónje die toch neit mee zo gebroekelik zeen in de alledaagse sjpraok. Mesjiens hób geer aafgeloupe zomer d'n diksjenaer in de henj gehad en deze gans doorgenómme; dan zal 't veur uch gein ènkel probleem zeen. Kiek mer èns wie wiet eur kènnis van 't Zittesj nog reik. Hie zeen de vraoge:

1. Etraonzjee

- a. Matras
- b. Eine vraeme
- c. Etaasj
- d. Sjtoul

2. Maste

- a. Vääol te aete gaeve
- b. Pääol op ei sjeep
- c. Ónkroed
- d. Kleier

3. Bubbelesenes

- a. Rokkejaeger
- b. Kaoke
- c. Kaetel
- d. Koors

4. Sjabaw

- a. Sjandaal
- b. Eme dae eine angere verlink
- c. Dröpke
- d. Gevreur

5. Goadsloon

- a. Geldj waat me in de kirk in 't mendje deit
- b. Loon van de pestoor
- c. Aalmous
- d. Moresjtampot

6. Kónvertute

- a. Aansjtèllerie
- b. Tuut veur sjlók in te doon
- c. Óngerein get vertèlle
- d. Get filtere

7. Perzóng

- a. Mit drie man same zènge
- b. Kasjot
- c. Pepier
- d. Voelènze

8. Kipkap

- a. Hawf haenke
- b. Groot mets
- c. Sjtekel
- d. Huitvleisj

9. Grieniezer

- a. Bääkend eemes
- b. Saort bril
- c. Kaore
- d. Unne

10. Flenzia

- a. Pannekouk
- b. Grip
- c. Sjteelpan
- d. Klein saort vogel

11. Duvelsbènjjer

- a. Zjwaor touw
- b. Meiningsversjil
- c. Roe persoon
- d. Geldjzak

12. Kisj

- a. Peisj
- b. Lol höbbe
- c. Sjtal
- d. Mósjel

sóms

sóms gaon ich mich d'r veur zètte meistens geit 't van allein ummer kump 't gans van bènne: de gedichskes van mien handj.

sóms sjrief ich ze es ich kaod bèn meistens óm uch get te keutele * ummer mit gans vääol plezeier: de gedichskes van mien handj.

sóms jao sjtaon ze in ei buiske meistens lees me ze dan waal ummer sjrief ich ze veur uch luuj: de gedichskes van mien handj.

*keutele (Zittesj) = kietelen (Holles)

2014@johnhertogh

Krisdiktee 2015

Nao twee gesjlaagde eerdere edities zal dit jaor veur de driede maol 't Zittesj Krisdiktee plaatsj vènje in 't Mariapark oppe Awwe Mert op daensdigaovend 15 december.

Jederein is wilkóm aan dit diktee deil te numme en degein mit de wenigste foute is de wènnaar van d'n aovend.

D'r wurd waal èns gedach dat d'r ein grote competitie is, dit is aevel neit 't geval. Me kènt 't aantal foute veur zich hawte of dees kènbaar make. 't Belangriekste is óm gezamelik op ein leuke meneier mit 't Zittesj ómgang te zeen. Sjrief uch de datum alvas in d'n agenda.

Veldeke Krisdiktee op 15 december óm 19.30 oere in 't Mariapark oppe Awwe Mert



Krismiddig

Op 13 december e.k. zal de jäärlikse krismiddig plaatsj vènje in de Patesjkirk oppe Mert.

Doordat de zusters aafsijed moosjte numme van de Agnetenberg höbbe veer mótte ómkieke nao ein nuuj lokatie. En mit dank aan 't Kirkbesjtuur van de Bènnesjtad höbbe veer dit gevónje in de Patesjkirk (St. Michielskirk) oppe Mert.



Ómdat 't nog ein paar maondj doert eer 't krismes is zeen veer nog flink ómgang mit 't regele van luuj die op kènne traë. Veer kènne hie nog neit vääol euver zègke mer wie 't d'r noe nao oet zuut wurd 't eine bezunjere middig. Sjrief uch de datum mer alvas op!

Veldeke Krismiddig op 13 december óm 14.30 oere in de Patesjkirk

John Hertogh

versjtaoke häöf (geheime tuinen)

op zaoterdigmörge hawf twelf percies
dan gaon veer get wanjele in ós eige sjtad
vanoet 't sjoon häöfke van jónkfer Isabelle
en Theo de gids zèngk "Zitterd allein"

veer loupe en loestere, waere neit muig
hae deit ós verhaole, zo wie me dat zaet
van Awe Mert, Solanus en euver de baek
of euver de vrieboom van ós aller Toon

veer sjtaon sóms op en sóms ónger de wal
en ruke, bekieke, geneite volop
mer deip in 't duustre Fort Sanderbout
haet jeder gedanke, dao wurte 't gans sjtil

euver Paesj- Plak- en Pötsjtraot
zjweitentaere nao baove nao ós patrones
dao blieve veer röste en gaon dan
kóntent weier trök nao de mert.

same riemp op sjame

jao
sjanse
nao
franse
toeriste
es die wóste
waat veer wiste
waore ze gans
gaer gebleve
haw ich bekans
niks gesjreve

Perkeiergeldj

ich gaon dees waek dan toch mer weier
euver de päöl op waeg nao tudder
koup mich dao wien en sjnaps en beier
ich bèn 't gans muig , dat ge-udder



ich höb mich....

zout op ei benkske
zoug waat 'r deig
zónger vääöl muite
zoef: weg sjone fits

ich höb mich dao wiejer
neit drök óm gemaak

keek nao de luuj
koum ein reaksie
kaffe woort kawd
klok sjloug hawf ein

ich höb mich dao wiejer
neit drök óm gemaak

tiedje gezaete
tillefoon reip mich
trök mer nao hoes
toen voul mich in:

wo is miene fits?

2014©johnhertogh



Sint Rosa

Waat zaese ??? Deil 1

Jeder jaor taege `t ènj van augustus, gaon veer oppe Kolleberg nao baove, óm te baeje bie ós Zittesj kapelke, zowie veer lang geleje koosjte belaoeve.

`t Geval waar mee es twee eeuw trök, ein lammenadige krankheid woort ós gebrach, eine haop elenig sjtóng ós Zitterder te wachte, de man mit de zeich sjtóng sjtikkem op wach.

Veur väälu luuj koum `t ènj van `t laeve d'raan, nemes koosj die erm kranke baeter make, de druivigste klanke van ós klokke klónke aldaag, veierentwintig oer zout me bie famieje te wake.

Óm de Zitterder zoväöl muigelik te sjpare, belaoefde me ein kapelke oppe Kolleberg te boewe, óm dan jeder jaor dao haer te gaon en te bae bie Sint Rosa óm op häör te vertroewe.

Ein wónjer vónj plaats: Rosa haw ós gehólpe, zie besjermde de Zitterder mit moud te gaeve, eine haop elenig woort ós gesjpaard, `t sjtedje koosj röstig wiejer laeve.

Es dank veur dees oetzunjere hulp, geit oppe berg de presesse al jaore lank, óm bie Sint Rosa te bae en te zènge;

Rosa bedank !!!!!

Léon van Binsbergen 2015



ZEET GEER ZE AUCH VLEIGE ???

Zeet geer ze auch vleige mer noe niet figuurlik mer letterlik: Oos gevaerde vrunj: De veugelkes om oos haer.

In de kommende biedrage bekieke veer de van ut Ollesj deks aafwiekende dialectname van de meis veurkommende veugel(kes) om oos haer.

Vruiger keeke veer in de bruineste of de jonge nog katsj waare of al fluchs(=Takkelingen).

Aester = Ekster (Picetus Picetus)

Aenj= Eend (Aenjebats=eendebout)

Aenjelokkesj= v.m. Sittarde schertsschutterij, heropgericht en ter ziele geaan in de jaren 50 van de vorige eeuw.

Akkermenke= Gele of veldkwikstaart (Motacilla flava) (flavus beteikent gael in ut Latien.

Appelvenk=Appelvink (Coccothraustes coccothraustes)

Deze vinkachtige onderscheidt zich van de boekvink (zie aldaar) vanwege zijn grotere bek, waarmee hij appelkitsje (klokhuizen) en zaden kan kraken.

Bermsies auch waal Berbke genuimp= Barmsijs (Carduelis flammia)

Biemeis=Koolmees (Parus major)

Bloumputter=bloemputter, grotere variant van de putter ook wel distelvink genoemd (Caruelis carduelis).

Bloutvenk= Goudvink (Pyrrhula pyrrhula), de grootse van de vinkachtigen in onze omgeving

Boukvenk= vink (Fringilla coelebs) ook wel pinker genoemd.

Zeer geliefde vogel, die niet zingt als de merel, niet kwettert en sjettert als de ekster maar slaat en daarom in de paartijd vaak geblindeerd werd opgekoft.

Naar hun slag werden de vinken in verschillende categorieën ingedeeld:

Unne tusterwiet, unne sjalmdieu of eine kees plit.

Uitwendig verschillende deze soorten niets.

Boumluiperke= Boomkruipertje (Certhia brachydactyla).

Breemetaatsje= Braamsluiper (Sylvia curruca)

Breem is in het Sittards een tak van een bramenstrijk.

Niet te verwarren met brumme, want dat is brem

Weurt vervolg

Broukzittert, juli 2015

Peter Boudewijn



Os Kolleberg

Es de Kollenberg èns koosj vertèlle
euver al oet vruiger jaore,
mennigein kreeg 't sjpaans benauwt
en van sjrik gries haore.

Zèk noe neit, waat zou dae meine
ich help uch waal mit eur gedanke,
dènk mèr èns aan 't eesjte muulke
en geer heurt weier de tooreklanke.

Wae sjeelde neit in de zanjtkoel
gong nao ónger oppe baom,
door 't zanjt de sjoon versjlete
en onnoch de bóks bie de aw kraom.

Wanjelent door de Duustergats
tössje buim en sjtruuk nao baove,
góngste baeë bie Sint Rosa,
om vääi gouts te belaoe.

Versjtaoke achter 't kapelke
woort gerouk de eesjte segrèt,
krank en dul wie eine kókkeral,
góng me heivesj en geliek nao bed.

Witste noch dien eesjte maedje
same oppe Toomel get verlaore,
zag 't mit verleifde uigskes
kómp jónk veer lègke ós in 't kaore.

Loug 'n witte daeke euver ós sjtad
reip de berg : kóm pès hie,
sjeierentaerend in wenjter kleier,
waat hauw veer sjpas ,waat waar veer blie.

Vääi is allewiele te doon
dat 't daagleich neit kènt verdrage,
neit allein vruiger mèr ouch allewiele,
blieve zaakes die neit maage.

Mèr gout dat de berg neit kènt vertelle
waat hie gesjreeve sjeit is neit zo erg,
es er koosj sjpraekes woort er zeker aafgebroeke
en dan hauw veer geine Kollenberg.

Léon van Binsbergen 2015

Presesse

Eine zóndig in Zitterd, vääi luuj oppe bein
de presesse trok door de bènnesjtad.
euver de Bonenbrök en de Brandj nao de mert,
hóbbe veer 't oots zo sjoon gehad ?

Beelde en relieke woorte sjtatig gedrage
in eine sjtoet van hónderde luuj
Sint Rosa keek sjtols nao de Zitterder
jederein leip in 't sjoonste tenue.

Maedjes in lang witte kleier
leipe es maagde, zo wie dat geit
ze wuifde mit frisje pawmetek
sjtikkem woort gelache, me wós van besjeit.

't Koor ónger leiding van oze professor
sjikde bie jeder rösaltaor ein leid door de sjtraote
wie sjoon klónk doe 't Tantum Ergo
haw veer 't mer zo gelaote.

De hoezer waare sjoon verseierd
mit ein Jesusbeeld en kaerse veur de deur
hoesaltaore zou me ze kènne nuime
bloume gouve al ein extra kleur.

't Kirkbesjtuur , burgemeister en notabele
d'r woort gebaed en me zag zich 't nuuts
koum d'n daeke mit 't Allerheiligste
kneilde me en maakde zich ein kruuts.

Ruuk ich in gedanke nog de wierouk
heur de hermenie mit presessemeziek
vuil mich in de zevenden hemel
es ich foto's van vruiger bekiek.

Léon van Binsbergen 2015



HALMA-CLUBKES, wo vinsj te die nog?

Wie Gust, noch ummer eine Hollenjer, zich beklaagde "dat 't oppe excursie haw geraegend" veulde ich mich obbèns zoan 60 jaor trök in 'n ganse anger welt.

't Waor 1955. Ich voetbalde bie Concordia, 'n Delftse sjtudentevoetbalclub wo ouch kènjer van de baeter luuj van Delft lid van waore. e Jaor of tweë bèn ich dao trainer van de juniore gewaes. Veer fitsde ós dan 't hart oet 't lief óm in 't Westland taeg "tuindersjochies" te sjepe. Zoa herinnerde eine van die, Aad van de Boom, mich pas nog d'raan wie ich mit dem achterop nao eine wedsjtried in Naaldwijk bèn gefits. Euverigens vónj 'r, wie v'r ós nao al die jaore trökzaoge, dat ich gaar niks verangerd waor. Hae ouch neet, vónj ich en ich realiseerde mich dat minstens eine van ós sjtóng te lege.

't Waor bie dae wedsjtried dat 't begoosj te raegene. De sjeidsrechter begreep dat veer die 30 kilomeëter nao Naaldwijk neet op de fits hawwe aafgelag óm in de kleidkamer te zitte en hae leet dus doorsjepe. Allein Wouter B., 'n "professorenzootje", vónj dao niks aan en verdween op eige houtje nao de kleidkamer. Mien euverwich leet 't aardig aafweite en wie zien "maatjes" 'm nao aafloop eine "keutel" neumde (allewel zou dat eine "eikel", "softie" of "mietje" zeen) waor zien weerwoord: "Ik doe dit puur voor de lol en zo is er geen lol aan."

Op de trökwaeg fitsde hae allein achteraan en ich houpde mer dat 'r gein pech zou kriege. Want 't lot van deze "sjoan-waer-voetballer" sjtóng al vanteveure vas: hae zou dan nao hoes mótte loupe. Bie 't afsjeid höbbe v'r 'm de goje raad gegaeve get te gaon doon, wobie 'r gegarandeerd dreuëg zou blieve. De suggestie van 'n halma-clubke hie in de buurt woort einsjtómig óngersjteund.

In datzelfde jaor deeg ich examen biochemie bie professor B. Nao 'n kort óngerhawd euver de "azijnzuurcyclus en slangengif" sjloot 'r aaf mit: "Meneër G. geer höb 't geweldig gedaon."

"Dank uch professor, ich höb 't ouch mit plezeer besjtudeerd."

"Prima, mer dat waor neet neuëdig want ich haw uch in gein geval laote zakke."

???

"Jao, geer höb deveur gezörg dat dae jóng van mich neet meë bie die club van uch kènt voetballe. Dus kèn ich uch neet laote zakke. M'n haet in tied van niks éne sjlechte naam. Ich houp dat g'r 't hiemit èns kènt zeen."

Dat koosj ich zeker.

Wie ich e paar maondj later examen biotechnologie bie professor R. moosj doon, vroeg dae aan 't ènj van de sessie: "Meneër G., noe 'n gans anger vraog. Ich höb ène zoon dat is nogal e min menke en dao wou ich bès ène flinke kael van make. Zeet geer neet dae keihelle voetbaltrainer?"

"Nae en jao professor. Nae, zoa hel vènj ich michzelf neet en jao, ich bèn waal degene dae geer bedoelt."

"Dat dach ich al, want dae naam van uch kump m'n hie in 't Weste kaolik taeg."

Zoa kreeg Concordia eine pupil debie en haolde ich mien biotechnologie. "Want", zag prof. R., "Ich kèn mich neet permittere miene zoon aan eine gesjeesde sjtudent toe te vertroewe. Geer zeet dus riant gesjlaag."

Obbèns zaog ich 'n kans óm versjneld aaf te sjtudere. Mer jaomer genóg koosj ich gein hoaglerare meë vènje mit zootjes die in aanmerking kaome veur 'n hel voetbaltraining. Zoa haet 't toch nog 'n tiedje gedoerd veurdat ich miene bul haw.

En Gust? Och, loat dem mer knotere. En wo vinsj te hie in de buurt ooch'n halma-clubke?

Wiel Gielkens

Limeri@k

in d'optochhal dao laefde ein heks

die plekde 't leifste mit Pattex

al klaefde aanein

doe hólp nog allein:

wae haet 'r veur mich nog ein gouw flex?

02-02-2015(c)johnhertogh



Antwoorde Aeve Prakkedènke

Antwoorde: 1B, 2A, 3D, 4C, 5C, 6A, 7B, 8D, 9A, 10B, 11C, 12B

Höb geer ein biedraag veur de volgende oetgaaf, sjik dees dan nao

veldekezitterd@gmail.com